

Latgaliskais seminars jaunišim “Atzolys” itūvosor byus Dagdā

Latgalīšu kultūrys kusteiba “Volūda” aicynoj jaunišus pīsadaleit latgaliskajā seminarā “Atzolys”, kas nu 6. da 9. augusta paradzāts Dagdā. Tymā varēs pīsadaleit jauniši vacumā nu 16 da 21 goda, lai vuiceitūs latgalīšu rokstu volūdu, īpasazeitu ar myusdīnu Latgolys personeibom i procesim, izzynuotu regiona kulturviesturi i ituos šaļts īspiejis jaunišim.

Jaunišu seminars “Atzolys” paradzāts nu 2024. gods 6. da 9. augusta Kruoslovys nūvoda Dagdā. Seminarā pīsadaleit varēs jaunišu nu 16 da 21 goda ar interesi vuiceitīs latgalīšu rokstu volūdu, runuot latgaliski, īpazeit latgaliskū kulturu i vierteibys, lai styprynuotu sovu identitati, byutu zynūši par procesim, nūtikšonom i personeibom Latgolā i latgaliskajā kulturā, iz pīršku poši vaira īsasaisteitu pīšūniskuos sabīdreibys veiduošonā, kai ari socializātūs, veiduoitu jaunus kontaktus, satureigi pavadeitu laiku, īsadvesmuotu nu Latgolā aktivūs ļaužu i vaira izzynuotu Dagdu, tuos apleicīni i aktivūs dareituojus.

Pyrmu reizi seminars “Atzolys” nūtyka 2004. godā Ludzys nūvoda Kuorsovā, īpīrškejais – 2022. godā – beja Bolvu nūvoda Rekovā, bet itūgod jaunišu sasatikšona byus Dagdā. “Atzolys” sovulaik bejs kai atspierīņa punkts ari daudzim itūšaļt latgaliskajā kulturtelpā zynomajim aktivistim vaira izzynuot i īsasaisteit kultūrys i sabīdryskejūs procesūs.

“Piec Rekovā nūtykušuo seminara nu jaunišu sajēmēm cīši lobys atsauksmis i īdviesmi, kai ari vēļ arviņ ar daudzim nu jūs sasateikam pasuokumūs, jī īsasaista “Volūdys” i cytuos latgaliskajuos aktivitātēs, atbolsta nūtikšonys. Vairuokim jaunišim seminars beja motivaceja vyspuor suokt voi kasdīnā vaira runuot latgaliski, par kū asam cīši, cīši pīceigi. Juotur nūceja, ka tai saīs ari piec sasatikšonys Dagdā,” soka latgalīšu kultūrys kusteibys “Volūda” vadeituoja Edeite Laime.

Ar jaunišim seminarā struoduos: latgalīšu rokstu volūdys nūdarbeibys pasnēgs latgalīšu rokstu volūdys specialiste Māra Mortuzāne-Muravska, improvizacejis nūdarbeibys vadeis pasuokumu vadeituojs i improvizators Kozmens (Mārtiņš Kozlovskis), par Latgolu i latgaliskū marketingā stuosteis uzjiemiejs i zeimyna “Latgalactica” radeituojs Raimonds Platācis, raidīrokstu veiduošonys praktiskū darbneicu vadeis jaunišu raidejuma “Pīci breinumi” komanda, par Latgolys informatīvū telpu runuos raidejumu veiduoituoja Vladislava Romanova, ar latgalīšu volūdys lītuošonu i vajadzeibu digitalajūs reikūs īpazeistynuos projekta “Bolsu tolka” puorstuove Kristīne Pokratniece, rodūšuos darbneicys vadeis dizainere Liāna Merņaka-Ņikitina, taipat seminarā gasteis ari cyti lektori, aktivisti i latgalīšu kultūrys personeibys.

Vysys seminarā paradzātuos aktivitatis, ādynuošona i nakšņuošona byus bezmaksas, dalinīkim pošim tik juonūdrūsynoj tikšana iz i nu seminara. Kab pīsadaleitu seminarā, jaunišim da 10. juņa juoaizpīlda dasacejuma anketa ite: <https://ej.uz/Atzolys2024>. Apstyprynuojumu par pīsadaleišonu seminarā reikuotuoji nūsyuteis da 14. juņa, jemūt vārā daleibīku motivaceju pīsadaleit.

Seminara nūtikšonu finansiali pabolsta Sabīdreibys integracejis fonds nu Kultūrys ministrejis daškiertūs Latvejis vaļsts budžeta leidzekļū, kai ari Latgolys kultūrys programa, kurū eistynoj Latgolys regiona atteisteibys agentura ar Vaļsts kulturkapitāla fonda mierkprogramys “Latviešu vēsturisko zemju attīstības programma” atbolstu. Seminara reikuotuojs – latgalīšu kultūrys kusteiba “Volūda” (bīdreiba “LgSC”).

Videoklips-seminarā radeituo dzīsmē nu īpīrškejuos reizis “Atzolu”: apvīneiba “Atzoliši” pīsad. Ūga – “Zalts sudobra vītā” <https://www.youtube.com/watch?v=KmHCtHra9uc>

Edeite Laime,
Latgalīšu kultūrys kusteiba “Volūda” (biedrība “LgSC”)